

**Namminersorlutik Oqartussat siunnersuummik uannga akuersinissaannut
Inatsisartut aalajangiiffigisassaattut siunnersuut: Akiligassatigut isumaqatigiissutit
pillugit inatsisip Kalaallit Nunaanni atuutsinneqalernissaanik peqqussut**
(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut
Naligiissitaanermullu Naalakkersuisoq)

Saqqummiussissut

(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut
Naligiissitaanermullu Naalakkersuisoq)

Siullermeerineq

Akiligassatigut isumaqatigiissutit pillugit inatsisip Kalaallit Nunaanni
atuutsinneqalernissaanik peqqussummik Namminersorlutik Oqartussat akuersinissaannut
Inatsisartut aalajangiiffigisassaattut siunnersuut, Naalakkersuisut sinnerlugit matumuuna
saqqummiuppara. Aningaasaatit, pigisallu aningaasanik nalillit pillugit inatsiseqarnerup
iluani akiligassarsilluni pisinermik inatsit Kalaallit Nunaanni atortuulersitaanerani
peqqussut nr. 33, 27. januar 1986-imeersoq nutartissallugu peqqussut siunertaqarpoq.

Akiligassatigut isumaqatigiissutini akiligassiisartut, atuisullu akornanni pitsaannerusumik,
ullutsinnullu naleqqunnerusumik malittarisassaqaarnissaa, atuisullu akiligassatigut
isumaqatigiissusiortillugit pitsaannerusumik illersorneqaarnissaat siunnersuuteqarnermi
pingaarnertut siunertaavoq. Akiligassiisartoq atuisumut akiligassiilluni imaluunniit
akiligassiiniarluni siumut neriorsuuteqarluni isumaqatigiissutit, akiligassarsinermi
isumaqatigiissutitut inatsimmi ilaatigut ilaatinneqarput.

Akiligassarsinermi isumaqatigiissutitut inatsimmik nutarsaannerup kingunerisaanik,
annikitsut ilanngunnagit soorlu ilaatigut pigisanik aalaakkaasunik qularnaveeqqusiilluni
taarsigassarsinerit aamma piffissami sivikitsumi taarsersugassanik taarsigassarsinermi
isumaqatigiissutit ilaat, inatsisip atuuffia atuisut akiligassarsineritut aamma
atortariaqakkanut taarsigassarsineritut tamanut siammassaaq. Assersuutigalugu Kalaallit
Nunaanni niuerfinni siunissami SMS-ikkut taarsigassarsisitsinnaanerit assigisaallu
sioqqullugit sillimaffigineqarsinnaalissapput.

Akiligassarsilluni pisinermi inatsimmut massakkut atuuttumut sanilliullugu,
isumaqatigiissusiornermi annikitsortai ilanngullugit paasissutissat amerlanerusut
paasissutissiissutigineqartussaammata, akiligassiisup paasissutissiisussaataitana
akiligassarsinermi isumaqatigiissutitut inatsisip annertuumik annertusivaa.

Assersuutigalugu akiligassiinermi ukiumut aningaasartuutit procentinngorlugit paasissutissiissutigineqartussaassapput, soorluttaaq akiligassarsinermi isumaqatigiisummi piumasaqaatinik atuisut sioqqutsisumik naliliinissaminnut piffissaqarnerulersinneqartut.

Inatsit malillugu akiligassarsinermi isumaqatigiissutinik, ullut 14-it iluini peqqissiminissamut periarfissaq aamma ilanngunneqarpoq. Tamanna pillugu eqqarsaatigilluarnagu isumaqatigiissutigineqarsimasunik, eqqarsaatigilluareerlugu pituttorsimaffigerusunngisaminnit atuisut aningaasartuuteqarfiunngitsumik tunuarnissaminnut periarfissaqarput. Ilutigisaanik atuisoq akiligassissallugu tatiginarnersoq inuussutissarsiutilik akiligassiiniaq, nalinginnaasumik siumut naliliisarnissaanik piumasaqaat ilanngunneqarpoq.

Inatsimmik nutarterineq atuisunut annertuumik iluaqutissanngortussaavoq, atortariaqakkanullu taarsigassarsinerit naleqqutinngitsut sioqqutissallugit.

Taamatut oqaaseqarlunnga Naalakkersuisut sinnerlugit immikkoortup Inatsisartuni oqaluuserineqarnissanut ingerlateqqippara.